

A Schoufköpfla (in kronach-frankenwäldler-Mundart)

Schoufkuepfschpiele sen gao lustige Leut,
blueß wäd me aus ihen Geplaude njet gscheidt.
Wä dou des Kaudwelsch alles richtig vesteht
brauchts nümme, dässe nei aane Schul meh geht.

Ich hou mich noogsetzt und hou zugeguckt,
secht dä aa gleich, daß fei dä "Kibitz" nje muckt;
dä ende hot "Lähra" und hot aa vespielt
und doch waon sa bedruckt, obe mit Zeug wu njet gilt!

Dä ende "tut raus" und wäd "ougstochng" gao,
me maant es wäön Metzge und doch is nje waoh!
Und dä ende häbt mit de Faust aufn Tiisch
und secht "all mei Lätta!", daß ich dich graod "dewüsch?"

Etz hom sa uns zwaa die "Schneid ougetacklt
und uns unnera pao "Krüötn" uns "ougenagglt!"
Dä ende, dä "paßt" und schreit "wejche die Muckng,"
und nei mit de "Sau", Ihe wäd euch noch duckng!

Dä dritt mecht a Gsicht und hot sich "vegejbm",
dä ende will "hoppe" und "hoppet" denejbm.
Dä vett paßt auf "wie a Hejfelesmache"
und "schmjet" dæonn die "BumpI", dou vegeht na sei Lache,

denn dä anne "hottre aa ve däre Sottn",
dou "färbln" die annen und ä kriegt die "Mottn".
Dä öscht secht, die "homme" und "dou gjuh ich noo";
dä zweit "sticht die Sau raus" wall ä etzt graod koo!

Und etz kümmt dä "Ruet", ä hott na "ze vett",
ä "kreuzt mitn Blaua" - a Glück, daß noch "geht".
Und "wejche den dou" und "ejbm aa deswejche"
su schpieln sa mit "Trümpf" ananne degejge.

"Gjuh fott, lään a Heondwerk!," maant ane zen Spaß
und dä ende secht: "Bin aa mit in däre Gaß!"
Blueß dä dritt schümpft, dou muß doch aane "bescheiß?"
"Ich hou fei en "Altn"! - gäll, dou seide leis!

Tut raus die pao "Ünte" und "König" dezu,
noch amol "gehts rüm" und dæonn is fei Ruh!
Su schpieln sa an "Schoufkuepf" die Schoufköpf vjee Stund;
dæonn lään sa die "Schüssela" bis nunte zen Grund.

Und wenn aa jejde schönte en Drejck "hot a Heiela" gejbm:
Su a Schoufköpfla is und bläbt doch es Schönsta im Lejbm!